



Činjenje dobročinstva nakon hadža (Meka)

Hatib: dr. Jasir ibn Rašid ed-Devseri

15. zul-hidždže 1445. po Hidžri / 21. juni 2024.

Hvala Allahu, Onome Koji je Svojom dobrotom olakšao puteve dobra, i Koji je Svojim robovima omogućio da hodočaste Njegovu blagoslovljenu Kuću, izvrše obrede, ispune svoje zavjete i nadaju se oprostima grijeha. Svjedočim da nema boga osim Allaha, Jedinog, Koji nema druga, i Koji stvara, propisuje i određuje, i svjedočim da je Muhammed, sallallahu alejhi ve sellem, Njegov rob i poslanik, neka su na njega, na njegovu porodicu i ashabe i one koji ih slijede u dobročinstvu Allahova milost, blagoslov i spas do Dana proživljenja.

Oporučujem sebi i vama bogobožnost, jer je bogobožnost najbolja poputnina i najbolja priprema za Dan povratka. Bojte se Allaha u svakom trenutku, i sjećajte se riječi Istinitog u Njegovoj jasnoj Knjizi: "Allah prima samo od onih koji su bogobožni." (El-Maida, 27)

O muslimani, prošla je jedna od najodabranijih sezona u godini, i završili su se dani hadža i njegovi uzvišeni obredi, u kojima su hadžije živjeli svoje najljepše i najbolje dane. Boravili su na blagoslovljenim mjestima, ponizno i predano podizali svoje ruke moleći Gospodara ljudi, očistili se od grijeha, pa blago njima na upotpunjenju obreda i na blagodatima i dobru kojima ih je Allah obdario.

Reci: "Neka se zato Allahovoj blagodati i milosti raduju, to je bolje od onoga što gomilaju." (Junus, 58)

Zahvaljajte Allahu na blagodatima i pomoći, zahvalnost je vjesnik uvećanja, a time ostvarujete jednu od intencija hadža i ibadeta u islamu. Onaj Koji poznaje nevidljivo i vidljivo kaže: "... i kad je Gospodar vaš objavio: 'Ako budete zahvalni, Ja ću vam, zacijelo, još više dati.'" (Ibrahim, 7)





Hodočasnici Allahove svete Kuće, izvršenjem obreda hadža otvorili ste čistu bijelu stranicu u svojim životima, i vratili ste se s hadža u odjeći čistoće, pa pokažite Allahu ono najbolje od vas, čvrsto donesite odluku da ćete ustrajati u pokornosti Allahu sve dok budete postojali i udaljiti se od grijeha do kraja svoga života i čuvajte ono što ste stekli i "ubrali", i pazite se da ne srušite ono što ste izgradili. "I ne budite kao ona koja bi svoju pređu rasprela kad bi je već bila čvrsto oprela." (En-Nahl, 92)

Znak mebrur, primljenog hadža jeste činjenje dobrog djela nakon dobrog djela i ustrajavanje u dobrim djelima. Uzvišeni kaže: "A kad završiš, molitvi se predaj." (Eš-Šerh, 7) Takvo je stanje vjernika – kada god završi jedan ibadet, poslije njega uradi drugi ibadet. Blago se ljudima čiji su blagdani primanje djela, čije su želje najčasnije i koji teže ka najpotpunijem stanju.

Za vjernika, kada su u pitanju dobra djela, ne postoji kraj, osim smrtnog časa. "I sve dok si živ, Gospodaru svome se klanjaj." (El-Hidžr, 99)

O vjernici, onaj ko se odazove Milostivom na hadžu, neka Mu se odazove i činjenjem dobrih djela na svakom mjestu i u svakom vremenu, a onaj ko se ustegne od ihramskih zabrana, treba znati da postoje stalne zabrane i neka se čuva šejtanovih stopa i ne približava se svetinjama Milostivog. Poslanik, sallallahu alejhi ve sellem, rekao je: "Svaki vladar ima svoje svetinje, a Allahove svetinje su Njegove zabrane." (Muttefekun alejhi)

Gosti Milostivog! Allahova uputa i pomoć ogleda se i u tome da se hadžija vrati svojoj kući sa čistim tevhidom – vjerom u Jednog Boga, što podrazumijeva da se njegovo srce popravilo, iman povećao, stanje ustabililo, ponašanje uljepšalo, ubjeđenje osnažilo i pobožnost povećala. Upitan je Hasan el-Basri: "Šta je hadž mebrur?", pa je rekao: "Da se vratiš svojoj kući ravnodušan prema dunjaluku, a željan ahireta."

O vi koji ste činili razne vrste ibadeta, držite se puta ustrajnosti, jer niste u vječnoj kući!





Hodočasnici Allahove svete Kuće, klanjači, za kraću hutbu i kraći namaz u Mesdžidul-haramu ovih dana postoje razlozi, a to su gužva i velike vrućine. Cilj je olakšati obavljanje namaza svima onima koji se nalaze u džamiji.

Neka Allah nagradi naše vladare u ovoj blagoslovljenoj zemlji za njihove velike i uobičajene napore, za njihova velika i znamenita djela, što je, uz Božiju milost, rezultiralo velikim uspjehom u hadžskoj sezoni ove kao i ranijih godina.

Neka ih Allah nagradi u naše i u vaše ime, i u ime islama i muslimana, najvećim dobrom i najobilnijom nagradom, i neka ta djela budu na vagi njihovih dobrih djela.

Zatim, znajte da vam je Allah naredio da donosite salavate i selame na Njegovog Vjerovjesnika, pa je rekao u mudroj Objavi: "Allah i meleki Njegovi blagosiljaju Vjerovjesnika. O vjernici, blagosiljajte ga i vi i šaljite mu pozdrav!" (El-Ahzab, 56)

Allah podario blagoslov meni i vama u časnom Kur'anu, i okoristio mene i vas njegovim ajetima i mudrom opomenom. Rekoh ovo i od Allaha Uzvišenog tražim oprost za sebe, vas i sve muslimane od svakog grijeha, a tražite i vi, On mnogo prašta i milostiv je.

